

आकाशवाणी जयपुर-अजमेर  
प्रादेशिक समाचार  
दिनांक 24.09.2024 समय: 18.45 बजे

- रेल मंत्री अश्विनी वैष्णव कह्यो- कवच 4.0 प्रणाली ऊं रेल हादसा रोकण मांय मदद मिलेला।
- राज्यपाल हरिभाऊ बागडे राज्य रा न्यारा-न्यारा विश्वविद्यालयां री नैक रैंकिंग करावण बाबत् तैयारियां करण र हुकम दीना।
- जयपुर नगर निगम हेरिटेज मांय निर्दलीय पार्षद कुसुम यादव कार्यवाहक मेयर बणी।
- राज्य रा कुछ और हलकां मांय ई चौमासा री रुत री बिरखा बंद व्ही- प्रदेश रा कुछ हलकां मांय एक सप्ताह और बिरखा व्हेवण रा आसार।

00000

रेल, सूचना प्राद्यौगिकी अर सूचना अर प्रसारण मंत्री अश्विनी वैष्णव आज जयपुर मांय प्रदेश भाजपा रा दफ़तर मांय पार्टी रा जयपुर शहर रा कार्यकर्तावां सागे बातचीत कीनी। वे मुख्यमंत्री भजन लाल शर्मा सागे ई वां रा रेहवास माथे मुलाकात कीनी। ई पाछे रेल मंत्री जयपुर रा गांधीनगर रेलवे टेशन माथे कर्या जा रह्या विकास रा कामां रो जायजो लीनो। ई मौके खबरनवीयां सागे बात करता थकां वैष्णव कह्यो के देश मांय एक हजार 324 टेशनां ने ओजू विकसित कर्या जा रह्या है। वे कह्यो के सगळां टेशनां माथे टेशनां रा दोन्यू सिरां ने जोडबा वाळा रुफ प्लाज़ा बणाया जावेला। मंत्री कह्यो के गांधीनगर देश रा वां अगाडी टेशनां मांय भेळो है जठे रुफ प्लाज़ा बणावण सारु गर्डर डालण रो काम पूरो व्हे ग्यो है। वे कह्यो के रुफ प्लाज़ा मांय भांत-भांत रा सुबीता मुहैया कराया जावेला।

.....

रेल मंत्री कोटा ऊं सवाईमाधोपुर बीचे लगायी ज्यी रेलवे लेणां री सुरक्षा प्रणाली कवच 4.0 रा बारा मांय ई जाणकारी दीनी। वे कह्यो के इण ऊं रेल हादसा रोकण मांय मदद मिलेला। मंत्री कह्यो के देश मांय साल 2030 ताई सगळी ठौड़ां कवच री व्यवस्था लगावणो तैय करी ज्यो है। मंत्री वैष्णव आज जयपुर ऊं सवाईमाधोपुर बीचे खास रेलगाडी मांय सफर कीनो। ई पाछे वे सवाईमाधोपुर ऊं सुमेरगंज मंडी ताई रेल रा इंजन मांय बैठ र कवच सुरक्षा प्रणाली री जांच कीनी। रेल मंत्री इणने बेहतरिन सुरक्षा प्रणाली बतायी।

.....

वे गंभीर हादसां रा हालात मांय मुसाफिरां ने बेगा ऊं बेगा बोगियां ऊं बाहर निकाळबा ऊं जुड्या पायलट प्रोजेक्ट री जाणकारी हांसिल कीनी। उत्तर-पश्चिम रेलवे रा बांदीकुई, मेड़तारोड़, लालगढ़ अर उदयपुर टेशनां माथे ई पायलट प्रोजेक्ट रा तहत खास टीमां लगायी ज्यी है। ई पायलट प्रोजेक्ट सारु 3 करोड़ 40 लाख रूप्या मंजूर करी ज्या है।

00000

केन्द्रीय कृषि और किसान कल्याण मंत्री शिवराज सिंह चौहान आज नई दिल्ली मांय किसानां अर किसान संगठनां रा नुमाइंदा सागे बातचीत कीनी। मीटिंग मांय करीब 50 किसान मौजूद हा। कृषि मंत्री बतायो के किसानां रा संगठनां रा नुमाइंदा साखां रा मोल अर वां रा बीमा रा बारा मांय केई सुझाव दीना।

00000

प्रधानमंत्री नरेन्द्र मोदी री अगुवाई वाळी केन्द्र सरकार रा तीजा कार्यकाल रा पहला एक सौ दिन मांय करी ज्या खास कामां री जाणकारी देवण सारू आकाशवाणी जयपुर रा प्रादेशिक समाचार बुलेटिनां मांय खास श्रृंखला चलायी ज्यी है। इण मांय आज पेश है। सूक्ष्म, लघु अर मध्यम उद्यम मंत्रालय री उपलब्धियां री जाणकारी—

प्रधानमंत्री रोजगार सृजन कार्यक्रम रा तहत 100 दिन मांय 3 हजार 148 करोड़ रुपया रा कर्ज मुहैया करा र 26 हजार 426 नुवा एमएसएमई उद्योग लगायी ज्या। इण ऊं नौकरी—धंधा रा 2 लाख ऊं बत्ता मौका मिलेला। मंत्रालय यशस्विनी अभियान ई चलायो है। इण रो मकसद महिलावां री अगुवाई मांय विकास ने बधावो देवणो अर उद्यमिता रे मार्फत महिलावां ने मजबूत बणावणो है। ई रा तैत महिला कारोबारियां मांय सरकारी योजनावां रा बारा मांय जाग जगावण सारू न्यारी—न्यारी ठोडां अभियान चलाया जा रह्या है। ई रा तैत पहलो कार्यक्रम 19 जुलाई ने जयपुर मांय राख्यी ज्यो हो, जिण मांय करीब साढे छः सौ महिला कारोबारी सिरकत कीनी। दूजो कार्यक्रम 11 सितम्बर ने झारखण्ड रा रांची मांय राख्यी ज्यो। ई साल ऐडा 17 और कार्यक्रम राख्या जावेला, ज्यां रो मकसद एक लाख महिलावां ने फायदो देवणो है।

0000

राष्ट्रपति द्रौपदी मुर्मू कह्यो है के लेखां री जांच रो काम असरदार तरीका ऊं करण सारू प्रौद्योगिकी रो विकास जरूरी है। वे आज नई दिल्ली मांय आला लेखा संस्थानां रा एशियाई संगठन री 16वीं सभा रा उद्घाटन जळसा मांय बोल रही ही। वे कह्यो के सरकारी हलका रा लेखां री जांच मांय जनता रा भला री योजनावां रा असर री जांच ई शामिल व्हे गयी है जो जनता री समान सेवा तय करे है।

राष्ट्रपति कह्यो के मौजूदा दौर मांय कृत्रिम बुद्धिमत्ता, डेटा एनालिटिक्स अर मशीन लर्निंग सरीखी डिजिटल प्रौद्योगिकी नुवा शासन री रीढ़ बण रही है। चार दिन रा ई सम्मेलन मांय साफगोई अर जवाबदेही ने बधावो देवण मांय आला लेखा परीक्षण संस्थानां रा खास काम रा बारा मांय चर्चा करी जा रही है।

00000

प्रदेश रा विश्वविद्यालयां ने नैक रैंकिंग दिरावणो तय करण सारू जयपुर मांय आज खास मीटिंग राख्यी ज्यी। मीटिंग री सदरत करता थकां राज्यपाल हरिभाऊ बागडे प्रदेश रा न्यारा—न्यारा विश्वविद्यालयां री निश्चित तौर ऊं नेक रैंकिंग करावण सारू जरूरी तैयारियां करण रा हुकम दीना। मीटिंग मांय ई सारू राष्ट्रीय शिक्षा नीति 2020 रे मुजब तैयारी करण, विश्वविद्यालयां मांय इन्क्यूबेशन अर इनोवेशन सेंटर खोलण, भारतीय ज्ञान परंपरा अर राष्ट्र प्रेम रा बारा मांय कोर्स चलावण बाबत ई चर्चा करी ज्यी।

00000

जयपुर नगर निगम—हेरिटेज री निर्दलीय पार्षद कुसुम यादव कार्यवाहक मेयर बणायी ज्यी है। कुसुम यादव 2 महीना तांई काम करेला। पार्षद चुनाव री बगत भारतीय जनता पार्टी कुसुम यादव ने टिकट नी दीनो हो, ज्यीं पाछे कुसुम बगावत कर र निर्दलीय उम्मीदवार रा तौर ऊं चुनाव लड़ र जीती ही। हालांकि चुनाव जीत्यां पाछे कुसुम यादव भाजपा री हिमायत कीनी ही। ई बीचे जयपुर नगर निगम हेरिटेज मांय कांग्रेस पार्टी रा 8 पार्षद बिना शर्त भारतीय जनता पार्टी मांय शामिल व्हे गया है। आं मांय सिविल लाइंस, आदर्श नगर अर किशनपोल विधानसभा हलकां रा पार्षद है। अ पार्षद भाजपा रा प्रदेश अध्यक्ष मदन राठौड़ अर नगरीय विकास मंत्री झाबर सिंह खर्रा ने बिना शर्त हिमायत रो कागद दस्तखत कर र दीनो। आं पार्षदां रे भाजपा मांय शामिल व्ह्यां पाछे नगर निगम—हेरिटेज मांय भाजपा ने बहुमत मिल गयो है। मेयर मुनेश गुर्जर रा निलंबन पाछे अब जयपुर नगर निगम—हेरिटेज मांय पार्षदां री तादाद 99 रह गयी है। आं मांय भाजपा रा पार्षदां री तादाद 53 व्हे गयी है, जदके कांग्रेस रा पार्षदां री तादाद 45 रह गयी है।

00000

राज्य रा कुछ और हलकां मांय चौमासा री ई रुत री बिरखा अब कम पड़बा लाग्यी है। मॉनसून वापसी रेखा अब चूरू, अजमेर अर माउंट आबू व्हेती निकळ रही है। हालांकि कोटा अर उदयपुर संभाग रा कुछ हलकां मांय 30 सितम्बर तांई बादळां री गाज़ सागे हल्की बिरखा व्हेवण रा आसार है। भरतपुर, जयपुर अर अजमेर संभाग रा ई कुछ हलकां मांय 27 ऊं 29 सितम्बर बीचे बारिश रा आसार है। ई बीचे बांसवाड़ा जिला रा कुशलगढ मांय 74 मिलीमीटर बारिश दर्ज करी ज्यी। ई बीचे टोंक जिला रा बीसलपुर बंधा मांय पाणी री आमद कम पड़ जावण रे कारण अब बंधा रा 5

दरुजा बंद कर दिया ज्या है अर अब केवल एक दरुजो 1 मिलीमीटर खोल र पाणी निकाल्यो जा रह्यो है। त्रिवेणी नदी मांय ई अब पाणी रो लेवल उतरण लाग्यो है।

00000

उपराष्ट्रपति जगदीप धनखड़ काल प्रदेश रा एक दिन रा दौरा सारु पधारेला। वां रो सीकर रा पंडित दीन दयाल उपाध्याय शेखावाटी विश्वविद्यालय मांय "पंडित दीन दयाल उपाध्याय" री मूरत रो अनावरण करण रो कार्यक्रम है। वां रो सीकर मांय "पंडित दीन दयाल उपाध्याय समिति उद्यान" रो उद्घाटन करण रो ई कार्यक्रम है।

00000

राज्यपाल हरिभाऊ बागडे पंडित दीनदयाल उपाध्याय री जयंती रे मौके वां ने याद करता थकां वां रा आदर्श अपनावण बाबत कह्यो है। राज्यपाल कह्यो के पंडित दीनदयाल उपाध्याय रा अंत्योदय रा विचार अर वां री सीख ने अपना र समाज रा पूरा विकास सारु मिल र काम करण री जरूरत है। ई मौके काल पंडित दीनदयाल उपाध्याय राष्ट्रीय स्मारक, धानक्या परां खास कार्यक्रम राख्यो जावेला, जिण मांय राज्यपाल हरिभाऊ बागडे खास पावणा रा तौर ऊं सिरकत करेला। कार्यक्रम रे दौरान प्रदर्शनी, चिकित्सा शिविर अर पुस्तकालय शोध केंद्र रो उद्घाटन ई कर्यो जावेला।

00000

स्वच्छता ही सेवा अभियान रा तैत प्रदेश मांय आज ई न्यारा-न्यारा कार्यक्रम राख्यी ज्या। पाली जिला रा रानी मांय नगरपालिका री ओर ऊं महात्मा गांधी सरकारी स्कूल मांय टाबरियां स्वच्छता ही सेवा "एस.एच.एस" री मानव श्रृंखला बणायी अर साफ-सफाई राखण री शपथ दिरायी ज्यी। बाडमेर मांय न्यू अंबेडकर चौराहा माथे श्रमदान रो कार्यक्रम राख्यी ज्यो। टोंक जिला रा देवली रा सरकारी कॉलेज अर महात्मा गाँधी राजकीय विद्यालय मांय स्वच्छता अभियान ऊं जुड़ी रैली निकाली ज्यी। आज ई एन.एस.एस. दिवस रे मौके स्वच्छता ही सेवा अभियान रा तैत सिंगल यूज प्लास्टिक भेळो कर र वां रो निपटारो करी ज्यो। ई सागे ई कॉलेज परिसर मांय साफ-सफाई कर र पौधा रोप्यी ज्या। सवाईमाधोपुर मांय आज नगर परिषद कार्यालय परिसर मांय सफाई कर्मचारियां सारु सुरक्षा शिविर लगायी ज्यो। इण मांय कर्मचारियां ने काम रे दौरान राख्यी जावण वाळी सावधानियां रा बारा मांय जाणकारी दीरीजी।

00000